

PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS

---

PERTANYAAN : LISAN

DARIPADA : TUAN KHOO POAY TIONG [KOTA MELAKA]

TARIKH : 7 OKTOBER 2019 (ISNIN)

**SOALAN**

Minta **MENTERI HAL EHWAL EKONOMI** menyatakan apakah keadaan dan statistik ketidakserataan pendapatan (*income inequality*) terkini di negara dan apakah strategi atau langkah-langkah yang diambil oleh Kerajaan dalam isu ini.

**JAWAPAN**

Tuan Yang di-Pertua,

1. Survei Pendapatan Isi Rumah (HIS) merupakan penyiasatan secara sampel yang meliputi negeri serta kawasan bandar dan luar bandar. HIS ini merupakan penyiasatan berkala yang dijalankan oleh Jabatan Perangkaan Malaysia dengan kekerapan dua kali bagi setiap lima tahun bertujuan untuk mengumpul pola taburan pendapatan isi rumah dan juga bagi mengenal pasti golongan isi rumah miskin. Penemuan penyiasatan yang terkini adalah pada tahun 2016.

2. Untuk makluman ahli Yang Berhormat, statistik ketidakserataan pendapatan (*income inequality*) boleh diukur dengan menggunakan beberapa kaedah. Antara indikator pengukuran ketidakserataan pendapatan adalah Indeks Gini, Indeks Theil dan Indeks Hoover.

3. Pengukuran statistik ketidakserataan pendapatan di Malaysia menggunakan indikator Pekali Gini (*Gini Coefficient*) yang dikira menggunakan sumber data daripada Survei HIS. Pekali Gini berada antara 0 dan 1, di mana 0 menunjukkan agihan pendapatan yang saksama, manakala nilai 1 menunjukkan agihan pendapatan paling tidak saksama.

4. Berdasarkan penemuan survei HIS 2014 dan 2016, Pekali Gini di Malaysia menurun kepada 0.399 daripada 0.401 (2014). Jurang pendapatan isi rumah di strata bandar menurun kepada 0.389 (berbanding 0.391, 2014). Manakala jurang pendapatan isi rumah strata luar bandar meningkat 0.364 (berbanding 0.355, 2014)

5. Di kalangan kumpulan etnik utama pula, jurang pendapatan bagi etnik India bertambah baik dicerminkan oleh penurunan Pekali Gini sebanyak 1.4 mata peratus daripada 0.382 (2016) kepada 0.396 (2014). Diikuti dengan Bumiputera (0.4 mata peratus) manakala Pekali Gini bagi etnik Cina meningkat sebanyak 0.6 mata peratus. Perincian statistik Pekali Gini mengikut strata dan etnik seperti di jadual 1.

**Jadual 1 : Pekali Gini mengikut strata dan etnik, Malaysia, 2014 dan 2016**

| <b>Pekali Gini</b>    | <b>2014</b>  | <b>2016</b>  |
|-----------------------|--------------|--------------|
| <b>Malaysia</b>       | <b>0.401</b> | <b>0.399</b> |
| <b>Strata</b>         |              |              |
| Bandar                | 0.391        | 0.389        |
| Luar Bandar           | 0.355        | 0.364        |
| <b>Kumpulan Etnik</b> |              |              |
| Bumiputera            | 0.389        | 0.385        |
| Cina                  | 0.405        | 0.411        |
| India                 | 0.396        | 0.382        |

6. Secara keseluruhannya, walaupun pertumbuhan ekonomi negara menunjukkan prestasi yang menggalakkan, namun ianya masih belum digembleng sepenuhnya bagi mencapai potensi yang optimum. Selain itu, terdapat pelbagai isu struktur yang perlu ditangani, antaranya sumber pertumbuhan yang masih bergantung kepada faktor pengeluaran tradisional seperti modal serta buruh dan bukannya peningkatan produktiviti.

7. Isu produktiviti berkait rapat dengan tahap kemahiran pekerja. Pada masa ini, industri masih didominasi oleh pekerjaan separuh mahir dan berkemahiran rendah yang merangkumi sebanyak 72.8 peratus daripada keseluruhan tenaga kerja.

8. Sebahagian besar industri di Malaysia masih bergantung kepada perdagangan komoditi mentah yang tidak mempunyai nilai ditambah yang tinggi serta kurang menghasilkan produk baharu. Industri sedia ada juga terlalu bergantung kepada pekerja asing dan hanya 37% daripada industri dalam sektor pembuatan dan 20% dalam sektor perkhidmatan mengguna pakai teknologi tinggi.

9. Berdasarkan Laporan Tahunan Bank Negara Malaysia 2017, gaji pekerja Malaysia adalah lebih rendah dan tidak setimpal berbanding dengan produktiviti buruh.

10. Bahagian pampasan pekerja kepada KDNK Malaysia masih rendah iaitu 35.7% pada tahun 2018 berbanding negara maju seperti Jerman sebanyak 51.5%, United Kingdom 49.4% dan Korea Selatan 45.7%.

11. Sehubungan dengan itu, bagi mengatasi isu berkaitan income inequality, Kerajaan telah melancarkan Wawasan Kemakmuran Bersama 2030 (WKB) yang merupakan hala tuju baharu pembangunan negara bagi tempoh 10 tahun mulai tahun 2021 hingga 2030.

12. Objektif pertama WKB adalah untuk menstruktur semula ekonomi ke arah yang lebih progresif, berpaksikan ilmu dan bernilai tinggi. Penekanan akan diberikan kepada peningkatan produktiviti sebagai

salah satu pemacu pertumbuhan ekonomi. Usaha juga akan dilaksanakan bagi menggalakkan industri untuk mempergiat aktiviti pertumbuhan ekonomi masa hadapan yang bernilai tinggi. Selain memperkukuhkan sektor pertumbuhan ekonomi sedia ada, Kerajaan akan terus meningkatkan inisiatif pendigitalan dan penerimgunaan teknologi secara lebih meluas terutamanya dalam kalangan Perusahaan Kecil dan Sederhana (PKS).

13. Selain daripada isu struktur, masih wujud jurang ekonomi yang ketara di setiap peringkat kumpulan pendapatan, wilayah, etnik, dan rantaian bekalan. Objektif kedua WKB akan menumpukan kepada usaha untuk merapatkan jurang tersebut. Jurang pendapatan yang ketara di antara kelas pendapatan berlaku berikutan pendapatan kumpulan isi rumah B40 lebih bergantung kepada penggajian dan kumpulan ini juga kurang memiliki aset yang boleh menjana pendapatan lain. Kerajaan yakin tumpuan kepada aktiviti ekonomi bernilai tinggi dan pewujudan pekerjaan berpendapatan tinggi akan menyumbang kepada usaha untuk merapatkan jurang ekonomi antara kumpulan pendapatan.

14. Di samping itu, Teras Strategik 5 WKB, Kesejahteraan Sosial, memberi penekanan kepada kebajikan semua kelompok masyarakat terutamanya golongan rentan ekonomi dan kumpulan isi rumah B40.

15. Dalam konteks jurang pembangunan antara wilayah, khususnya kawasan bandar dan luar bandar, Kerajaan sedar bahawa jurang pengagihan ekonomi antara kedua-dua kawasan semakin melebar. Dalam Teras Strategik Kedua, terdapat 15 cadangan Aktiviti Pertumbuhan Ekonomi Utama (KEGA). Antaranya ialah tumpuan kepada Pertanian Pintar yang akan meningkatkan produktiviti hasil tanaman terutamanya untuk agropeneur di luar bandar.

16. Selain itu, penekanan kepada Komoditi Malaysia 2.0 membolehkan tumpuan diberikan kepada penghasilan produk hiliran daripada komoditi, seperti sawit dan getah, supaya dapat menjana nilai ditambah dan pulangan yang lebih tinggi. Dalam Teras Strategik keenam WKB pula, iaitu Keterangkuman Wilayah, pemetaan titik tumpuan ekonomi, dengan izin, *economic hot spots*, akan dilaksanakan. Usaha ini

## NO. SOALAN : 49

bagi mengenal pasti kawasan luar bandar yang berpotensi sebagai pusat aktiviti ekonomi yang mampan. Malaysia akan memanfaatkan peluang daripada perkembangan peralihan ekonomi dunia dari Eropah ke Asia dengan menjadikan negara sebagai Hub Ekonomi ASEAN.

17. Bagi mengembleng pelbagai usaha di bawah WKB, dasar, strategi dan inisiatif khusus sedang dirangka oleh Kerajaan dan dijadual akan dibentangkan dalam Rancangan Malaysia Kedua Belas (RMKe-12) pada tahun hadapan. Penjajaran WKB akan diteruskan dalam Rancangan Malaysia Ketiga Belas (RMKe-13).

18. Kerajaan yakin matlamat WKB untuk melihat seluruh rakyat mengecapi satu kehidupan wajar menjelang 2030 akan dapat direalisasikan.

Sekian, terima kasih.